

# RI TYOXLAJ MIXA RUK' RI UPETB'AL

## RI TYOXLAJ UXLABAXEL

### Misa con Confirmación

#### Ri Nab'e Tzij

¿La k'o jun kkowinik che man kuya ta ri qasna' chkech we e'are' ri' che xk'amtaj ri Tyoxlaj Uxlab'xel kumal je' jas ri uj?

#### Ri Etaqo'nelab' (Hechos) 10,44-48

<sup>44</sup>Aretaq chi' tajin kch'aw ri Lu', ri Tyoxlaj Uxlab'xel xtzaq uloq pakiwi' konojel ri tajin kkita ri tzij. <sup>45</sup>K'atek'uri' konojel ri k'o kikojonik che q'atom uwi' ri kikowil, che epetinaq uloq ruk' ri Lu', sachib'al k'u'x kekanajik aretaq chi' kkilo che ri usipanik ri Tyoxlaj Uxlab'xel xq'ejejexik pakiwi' ri e'are' che man pusim ta uwi' ri kikowil. <sup>46</sup>Rumal rech che kkito che ri e'are' kech'aw pa taq k'i ch'ab'al e che kkib'ij nimalaj taq utzil puwi' ri Dyos. K'atek'uri', ri Lu' kub'ij: <sup>47</sup>«¿La k'o jun kkowinik che man kuya ta ri qasna' chkech we e'are' ri' che xk'amtaj ri Tyoxlaj Uxlab'xel kumal je' jas ri uj?». <sup>48</sup>K'atek'uri', ktaqanik arech kya ri qasna' chkech pa ri ub'i' ri Jesukristo. Xas chanim kkita chrech, arech ri are' kkanaj kan kuk' keb' oxib' q'ij.

**Are wa' ri Utzij ri Qajaw**

**R/. Katqaq'ijilaj Qajaw**

**Ri B'ix 22 (21)**

**R/.: Kinya' ub'ixik wa' ri ab'i' chkech ri ewachalal**

<sup>23</sup>Kinya' ub'ixik wa' ri ab'i' chkech ri ewachalal,

chkixo'l ri winaq, nim uq'ijil ri' kinya ri ab'i'.

<sup>24</sup>Ri ix, che ixib'im iwib' chuwach ri Ajawxel,

nim chiwila' wi ri are',

iwonojel ri ix uwinaq ri Jakob',

chik'utu' b'a' ri uq'ijil, ri ix,

iwonojel ix uwinaq ri Isra'el kixib'ij iwib' chrech. **R/.**

<sup>26</sup>Xas awuk' at kape wi ri nuki'kotemal

pa ri nimalaj mulin ib',

kinb'an na ri xinya ri nutzij chrech,

chkiwach ri kixib'im kib' chrech ri Are'.

<sup>27</sup>Kewa' ri' ri meb'a'ib' e sib'alaj kenoj ri',

sib'alaj keki'kot ri' ruk' ri Yahweh, ri kkitzujukj ri Are'.

Pa junalik k'aslik ri iwanima'. **R/.**

<sup>28</sup>Konojel ri winaq rech ri uxkut kaj ulew,  
 kkina'tisaj wa' weri' e ketzalij ri' ruk' ri Ajawxel,  
 konojel ri esiwantinimit,  
 kkixulb'a' kiwach ri' cho ri ulew chuwach ri Are'.

<sup>29</sup>Erech ri Ajawxel ri e'ajawinel,  
 erech ri ajaw ri siwan taq tinimit. **R/.**

<sup>31</sup>Ri wija'al kupatanij na ri are',  
 ri are' kuya' ub'ixik ri' ri Ajawxel pa taq ri junab'

<sup>32</sup>che petinaq, kuya' ub'ixik ri' ri usuk'il,  
 chkech ri winaq che k'ateri' ke'alaxik;  
 are wa' ri uchak. **R/.**

## **Ri Utzalaj Tzij**

**Jochlaj tzij chuxe' kanoq ri Utzalaj Tzij Jn 20,22**

¡Aleluya! ¡Aleluya! **R/.**

Chik'ama' b'a' ri Tyoxlaj Uxlab'xel

¡Aleluya! **R/.**

## **Ri Utzalaj Tzij rech ri Tyoxlaj Xwan 20,19-22**

<sup>19</sup>Pa xq'e'qal chrech we jun q'ij ri', ri nab'e q'ij chech we xmano ri', tz'apitalik taq ri uchi'ja jawije' ek'o wi ri etijoxelab', rumal che kixib'im kib' chkech ri e'ajjudi'o; kpe ri Jesus e ktak'i' panik'aj chkech e kub'ij: «Nimalaj utzil iwuk' ri ix!». <sup>20</sup>Aretaq chi' xb'itaj weri', kuk'ut ri uq'ab' e ri utzaltmal uk'u'x chkiwach. Ri etijoxelab', sib'alaj keki'kotik aretaq chi' kkil uwach ri Ajawxel. <sup>21</sup>K'atek'uri', kub'ij chi jumul chkech: «Nimalaj utzil iwuk' ri ix! Je' jas nutaqik uloq xub'an ri Tatxel, xoquje' ri in kixintaq ub'ik».

<sup>22</sup>Aretaq chi' xb'itaj weri', ke'uxut'uj pakiwi', tek'uri' kub'ij chkech: Chik'ama' b'a' ri Tyoxlaj Uxlab'xel.

**Are wa' ri Utzij ri Qajaw**

**R/. Katqaq'ijilaj Qajaw**